

AAQQIISUT

Aalajangiussassatut siunnersuut 27. februar 2012-imik ullulerneqartoq taarserpaa, siunnersuutip aalajangiussassatut siunnersuutitut oqaasertalersornissaata kinguneranik teknikkikkut iluarsineqarpoq.

Inatsisartut malittarisassaanni § 33, imm. 4 naapertorlugu aalajangiussassatut siunnersuut tulliuuttoq Naalakkersuisut maanna saqqummiuppaat.

Danmarkip Nationalbankia pillugu inatsisip allangortinneqarnissaa pillugu inatsisip kunnigip peqqussutaatigut Kalaallit Nunaannut atortussangortinneqarnissaanik kaammattuinnisaaq pillugu inatsisartut aalajangiussassaataut siunnersuut.

(Inuussutissarsiornermut Aatsitassanullu Naalakkersuisoq)

Tunngavilersuut

Danmarkip Nationalbankiata suliassaraa isumannaatsumik aningaasaqarnerup attatiinnarnissaa kiisalu aningaasat kaaviiarnerisa attartortitsissarnerullu pisariillisarnissaat malittarisaaqartinnissaallu suliassaralugu. Tamanna ilaatigut isumaqarpoq aningaasaqarnikkut aalajaassuseq Danmarkip Nationalbankiata alaatsinaattaraa, aningaasaqarnermillu ingerlatsiviusumi pissutsinik arlalinnik nalilersueqqissaartarpoq, aalajaassuseq ilanngullugu. Nalilersueqqissaarnermi tunngavigineqartarput Finanstilsynemit paasissutissat kiisalu paasissutissat Nationalbankenip nammineq katersorsimasai.

Aningaasanik nunanut allanut nunanillu allanit nuutsitsinerit aammalu akiligassat pissarsiasallu pillugit paasissutissat Danmarkip Nationalbankiata katersortarpai. Naatsorsueqqissaarnermik suliaqarnermut atatillugu paasissutissat pissarsiarineqartut isertuussatut isigineqartarput, naatsorsueqqissaarnermullu taamaallaat atorneqarsinnaallutik, tak. sulianik suliarinninneq pillugu inatsimmi § 30.

Aningaasaqarnikkut ajornartorsiornerup erseqqissisippaa Nationalbankip paasissutissanik katersukkaminik naatsorsueqqissaarnerup saniatigut suliassat allat suliarineqarnerannut atuisinnaanissaa pisariaqartinneqartoq. Tamanna annerusumik atuuppoq aningaasaqarnikkut aalajaassutsip nakkutigineranut atatillugu, kiisalu aningaasaqarnermut tunngasuni europami suleqatigiinnermut Nationalbankenip peqataaneranut atatillugu.

Naak aningaasaqarnermik suliaqarfiusumi qanoq ingerlasoqarneranik Nationalbankenip nakkutillinermini ataatsimut isiginninneq tunngavigisaraluaraa, ilaanneeriarluni pisoqariataarsinnaasarpoq, taamaasilluni Nationalbankenip nalilersueqqissaarnerminut nalilersuinerminullu suliaqarfiit ataasiakkaat pillugit paasissutissanik tunngaveqarnisaaq pisariaqartissinnaallugu. Paasissutissat pineqartut nalinginnaasumik tassaapput naatsorsueqqissaarnermut atatillugu paasissutissat pissarsiarineqarsimasut.

Europami aningaasaqarnikkut imminut qanimut attuumassuteqarnerit kinguneranik, europami suleqatigiinnermut atatillugu naatsorsueqqissaarnermut paasissutissat isertuussat Nationalbankenimit ingerlateqqinneqarsinnaanissaat maanna pisariaqartinneqalersimavoq. Aammattaaq aningaasaqarnikkut aalajaassutsip nakkutiginerata nukittorsarnissaanik EU-p pilersaarutaanut atatillugu European Systemic Risk Board (ESRB)-mik taaneqartup

pilersitsineranut atasumik Nationalbanken paasissutissanik isertuussanik ingerlatitseqqinnissamik pisariaqartitsilersinnaavoq.

ESRB-mik pilersitsinerup kingunerissavaa, naatsorsueqqissaarnermut paasissutissat tunniunneqarnissaannut naalagaaffinni oqartussaasunut ESRB-mut allatseqarfik qinnuteqarsinnaatitaassalluni, paasissutissat isertuussat ESRB-mi suleqatigiinnermut pisariaqartinneqartut nalilerneqartut ilanngullugit.

Danmarkip Nationalbankia pillugu inatsisip allanngortinneqarnissaanut inatsisissatut siunnersuutip imaa

Inatsisissatut siunnersuummi malittarisassaqqarpoq Danmarkip Nationalbankiata inuit suliffeqarfiillu Kalaallit Nunaanni angerlarsimaffeqartut pillugit paasissutissat pissarsiariniarsinnaagai, taakku aningaasaqarnermut tunngasunik suliaqarpata, nunanut allanut akiligassaqqarpata imaluunniit taakkunanga pissaaqarpata imaluunniit pappialanik nalilinnik tunniussisimappata pigisaqqarpataluunniit, imaluunniit tunisassianik aningaasaqarnermut tunngasunik niuerneramik oqimaaqatigiissitsinermilluunniit kiisalu akiliinermik ingerlataqqarpata.

Aammattaaq Danmarkip Nationalbankiata paasissutissat isertuussat ingerlateqqissinnaavai, qanoq erseqqitsigisumik suliarinerannut apeqqutaapput Qitiusumik aningaaseriviit europami suleqatigiiffiannut aamma European Systemic Risk Board-imut atatillugu pineqartup suliaassasa suliarinerannut pisariaqartinneqartut.

Inatsisissatut siunnersuutikkut siunnersuutigineqarpoq, isumannaatsumik aningaasaqarnerup attatiinnarnissaanut kiisalu aningaasanik kaaviiartitsinerup attartortitsisarnerullu pisariinnerulernissaanut malittarisassaqqartinnissaanullu paasissutissanik Nationalbankenip pisariaqartitaanik Nationalbanken katersinissamut atuinissamullu inatsisitigut toqqaannartumik piginnaatinneqalernissaa.

Inatsisissatut siunnersuutikkut Nationalbanken periarfissaqqalissaaq paasissutissanik katersorneqartunik atuinissamut, ilaatigut aningaasaqarnerup aalajaassusaanik nalilersueqqissaarnermut nalilersuinermullu, aningaaseriviit aningaasanik tigeriaannarnik ajornartorsiuteqarnerisa nalilersornerinut kiisalu aningaasat nunallu allat aningaasat pillugit anguniakkat suliarinerannut atatillugu paasissutissat atorsinnaallugit. Tamatuma saniatigut europami ESCB-mi (Qitiusumik Aningaaseriviit Europami Suleqatigiiffianni) aamma ESRB-mi (The European Systemic Risk Board-imi) suleqatigiinnermut atatillugu Nationalbanken paasissutissanik isertuussanik erseqqinnerusumik killiligaasumik ingerlatitseqqissinnaassaaq.

Aningaasatigut kinguneri

Inatsisissatut siunnersuut pisortanut namminersortunulluunniit, imaluunniit innuttaasunut aningaasatigut kinguneqassanngitsoq nalilerneqarpoq.

Attaveqatigiinneq

Soqanngilaq

Tusarniaaneq

Inatsisissatut siunnersuut GrønlandsBANKEN-imut aamma BankNordik-imut tusarniaassutigineqarpoq.

BankNordik inatsisissatut siunnersuummut oqaaseqaateqanngilaq.

Grønlandsbankenip oqaaseqaataannit imaqarniliaq:

Danmarkip Nationalbankia pillugu inatsisip allanngortinneqarneratigut suliniutigineqartut Grønlandsbankenip silatusaartutut isigai. Kalaallit tungaannit isigalugu inatsimmut maalaarutituaq tassaavoq Kalaallit Nunaannut naatsorsueqqissaarnernik europami oqartussaasunut tunniussisariaqalersinnaaneq, taakku kisitsisitigut atortussanik Kalaallit Nunaanneersunik toqqaannartumik piumasaqarsinnaanngimmata. Taamaattoq tamanna GrønlandsBankenip tungaanit ernumassuteqarnissamut tunngavissiinnigilaq, tak. inatsisissatut siunnersuummut oqaaseqaatit.

Inatsisissatulli siunnersuut kalaallit suliffeqarfiinit ernumassutigineqassappat, nalilersoqqinneqartariaqarlunilu, tamatumunnga pissutaavoq kalaallit suliffeqarfiinit nationalbankimut danskillu oqartussaasuinut allanut paasissutissanik elektronik atorlugu nassitsinissamik periarfissiisunik aaqiissutissanik sulii siunnersuuteqartoqasimanninnera.

GrønlandsBANKEN CVR normumik pissarsinissamut periarfissaqanngilaq, taanna elektronik atorlugu atsiernerit atornissaannut piumasaqaataammat, taamaattumik paasissutissat Kalaallit Nunaanneersut tigussaasunngorlugit nassiunneqartariaqarput. GrønlandsBANKEN aaqiissutissamik nassaarniarsimagaluarpoq, ajornarsimavorli. GrønlandsBANKEN-ip aaqiissutissatut periarfissat marluk tikkuarpai. Danmarkimi inatsimmik allanngortitsisoqarsinnaavoq, imaluunniit qarasaasiakkut periutsit eqqarsaatigut GER normut teknikkikkut atorneqarsinnaasunngortinneqartariaqarlutik.

Taamaattumik GER-imik aamma CVR-imik periutsit teknikkikkut imminnut ataqatigiissinneqarsinnaanerisa misissorneqarnisaat Grønlandsbanken-ip naapertuuttutut isigaa, taamaasilluni periutsit inatsisitigut attuumassuteqanngitsumik ingerlaqatigiissinnaallutik, peqatigisaanillu oqartussaasunut attuumassuteqartunut paasissutissanik paarlaaqatigiittarneq pitsaalluinnartoq periarfissaalissalluni. Nalunaaruteqartarnermut malittarisassat atuutilertinnagit ajornartorsiutip qulaani taaneqartup aaqiivigineqarnissaa GrønlandsBANKEN-ip neriuutigaa.

Kingornagut qarasaasiakkut allakkiami GrønlandsBANKEN-ip kaammattuutigaa aatsaat 2012-ip naalernerani kingusinnerpaamillu marts 2013-imi elektronik atorlugu nalunaaruteqassallutik, tamatumani MF13 pillugu nalunaarutit nalunaarutigineqarsinnaassallutik.

Tusarniaanermi akissuteqaat Danmarkimi Erhvervs- og Økonomiministeriamut nassiunneqarpoq.

Kalaallit Nunaanni Akileraartarneq pillugu oqartussaasut naapertorlugit ajornartorsiummut qulaani pineqartumut maanna aaqiissutissaqartoqanngilaq.

Tamanna tunuliaqutaralugu Naalakkersuisut inassutigaat, Danmarkip Nationalbankia pillugu inatsisip allanngortinneqarnissaanik ilusiliussassatut siunnersuutip Kunngip peqqussutaatigut atortussanngortinneqarnissaa pillugu Inatsisartut akuersinerat Finanstilsynet-imut nalunaarutigineqassasoq.